

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL KEDUA
PARLIMEN KEEMPAT BELAS
MAJLIS MESYUARAT DEWAN RAKYAT
1 HINGGA 18 JULAI 2019

PERTANYAAN : LISAN

DARIPADA : DATO' DR. NORAINI AHMAD [PARIT SULONG]

TARIKH : 1 JULAI 2019 (ISNIN)

SOALAN :

Dato' Dr. Noraini Ahmad [Parit Sulong] minta **MENTERI INDUSTRI UTAMA** menyatakan pendirian Kerajaan dalam penerapan pensijilan *Malaysia Sustainable Palm Oil* (MSPO) yang akan diwajibkan pelaksanaannya Disember ini, dan bagaimana falsafah tersebut dapat memberi kebaikan dari aspek ekonomi kepada pekebun-pekebun kecil yang semakin terkesan dengan penurunan harga minyak sawit.

JAWAPAN

Tuan Yang Di-Pertua,

Izinkan saya menjawab soalan ini **bersekali dengan soalan yang telah dibangkitkan oleh Yang Berhormat Parit pada 1 Julai 2019, Yang Berhormat Jelebu pada 4 Julai 2019, Yang Berhormat Padang Terap dan Yang Berhormat Kemaman pada 10 Julai 2019** yang juga menyentuh mengenai Pensijilan Minyak Sawit Mampan Malaysia (MSPO) dari aspek bentuk bantuan kepada pekebun kecil, statistik terkini pencapaian dan juga peranan MSPO terhadap menjawab tohmahan Kesatuan Eropah (EU).

Untuk makluman Yang Berhormat, Kerajaan tetap dengan pendirian untuk terus melaksanakan pensijilan MSPO bagi industri sawit negara dan memandatorikannya bermula 1 Januari 2020. Ini selaras dengan

SOALAN NO : 8

kenyataan oleh YAB Perdana Menteri semasa ucapan beliau dalam Perhimpunan Agung Pertubuhan Bangsa-Bangsa Bersatu (PBB) pada 29 September 2018 iaitu Malaysia akan pastikan semua minyak sawitnya mematuhi standard MSPO menjelang 2020.

Pelaksanaan MSPO ini merupakan langkah utama Kerajaan ke arah mewujudkan sistem kemampunan bagi menjenamakan minyak sawit Malaysia di peringkat antarabangsa. Usaha juga dilakukan untuk memastikan penerimaan dan pengiktirafan pensijilan MSPO secara global. Kerajaan yakin, dari segi ekonomi, MSPO akan membuka akses pasaran lebih luas untuk pasaran minyak sawit mampan Malaysia di negara-negara pengimport. Ini kerana kebanyakan negara-negara pengimport di dunia pada masa ini amat mementingkan aspek kemampunan dalam proses pengeluaran produk.

Oleh itu, pensijilan MSPO ini akan secara langsung membantu pekebun kecil mendapatkan pengiktirafan minyak sawit yang mampan terutamanya oleh negara-negara pengimport utama minyak sawit Malaysia. Ini seterusnya akan meningkatkan pendapatan pekebun kecil melalui akses pasaran yang lebih luas dengan hasil yang lebih berkualiti, mesra alam dan mampan. Disamping itu, pensijilan MSPO ini juga membantu dalam penjagaan alam sekitar yang turut memberi manfaat kepada pekebun kecil dari segi keselamatan dan kesihatan dalam pengurusan kebun sawit.

Tuan Yang Di-Pertua,

Kementerian akan meneruskan usaha untuk memastikan para pekebun kecil mematuhi dan mendapat pensijilan MSPO serta menyediakan bantuan kepada mereka. Kementerian melalui agensi seperti Lembaga Minyak Sawit Malaysia (MPOB) dan Majlis Pensijilan Minyak Sawit Malaysia (MPOCC) sedang menyediakan latihan secara percuma kepada mereka bagi memahami dan mematuhi keperluan piawai pensijilan. Selain itu, pegawai TUNAS MPOB juga bersedia memberi khidmat nasihat teknikal mengenai Amalan Pertanian Baik (GAP) kepada para pekebun kecil. Program Jelajah MSPO ke seluruh negara telah diadakan sebagai usaha turun padang untuk memberi penerangan dan bantuan teknikal

SOALAN NO : 8

kepada para pekebun kecil ke arah pensijilan. Program ini juga dirangka mengikut kesesuaian penduduk setempat bagi memudahkan komunikasi dalam memastikan pemahaman tentang MSPO dan seterusnya diterima pakai oleh pekebun kecil.

Untuk makluman, Kerajaan telah menyediakan dana bagi membantu pekebun kecil mendapatkan pensijilan MSPO yang merangkumi kos yuran pensijilan, pembelian peralatan perlindungan diri (PPE) dan pembinaan rak bahan kimia. Selain itu, Kerajaan juga turut menanggung kos latihan dan taklimat yang diberikan kepada pekebun kecil sawit di seluruh negara. Pengumuman geran MSPO untuk pengusaha sawit oleh Kementerian Kewangan baru-baru ini juga merangkumi bantuan kepada pekebun kecil tersusun bagi menggalakkan lebih ramai penanam sawit mendapat pensijilan MSPO.

Tuan Yang Di-Pertua,

Masih terlalu awal bagi pihak Kerajaan untuk mengukur sejauh mana MSPO dapat membantu menjawab tohmahan yang dilemparkan EU memandangkan usaha kita ke arah pensijilan masih belum selesai sehingga ke penghujung tahun ini. Walau bagaimanapun, data eksport minyak sawit dan produk berasaskan sawit ke negara Kesatuan Eropah telah meningkat 3.3% dari 971,670 tan (Januari-Mac 2018) kepada 1,004,140 tan (Januari - Mac 2019).

Statistik juga menunjukkan 104,354 pekebun kecil telah mendapat persijilan MSPO sehingga Mei 2019.

Sekian, terima kasih.